

StAD Bregenz Urkunde Nr. 515
am 10.11.1539; (Acker Häfenberg)

Ich Elsbetha Salzmennin weylannd Adamen Franzen seligen gelassen witib im gericht torenbüren
gesessen, Bekhenn öffentlich
für mich mein erben unnd nachkomen, unnd thun kundt menigclichem mit dem brief, Das ich mit
wolbedachtem Sinn unnd
mut zittiger vorbetrachtung, Auch Sonnder mit Ratt gunst hilff wissen unnd bewilligen des Beschaiden
Jacoben Bildstains
als meins mit Recht gegeben vogts, Dem Erbern Hannsen weysen Bürger zu Bregennz, unnd als der
Zeit, uss bevelch der,
Ersamen unnd weisen Stattamman unnd Rats der Statt Bregenz, ain factor unnd einzieher der Vigilia
oder Spienn Zins, unnd
allen seinen Nachkomen einziehern, Ains Stätten vessten unnd ewigen koufs wie der allenthalb guot
volkomen Crafft unnd macht
hat haben sol kann unnd mag Recht unnd Redlich zu kouffen geben hab unnd gib Innen in Crafft ditz
briefs Zwelff schilling pfennig
guter generer ditz Lannds werung, Rechts stäts Järlichs unnd ewigs Zins unnd gelts welches
Hoptguts ich Laut ains Zins=
briefs so zwelff pfundt pfennig Hoptguts unnd zwelff schilling pfennig Järlichs Zins ausweißen unnd ich
der gemelten Vigilia
oder Speen ab meinen guetern zethun schuldig geweißt, welcher Zinshoptbrief aber verlegt oder
verloren worden ist, usgericht
unnd bezallt bin, Usser unnd ab meinem aigen Juchart ackher zu Häfenberg gelegen, Stosset an
Even Frenzinen, an die gas=
sen, unnd oben und hinden an Adamen Klocker, Söllich gemelte Juchart ackher sol mit aller Irer wittin
nutzen Rechten gerechtig=
kaiten eigenschaften unnd zugehorden, Davon nichts ausgenommen, umb bemelt Hoptgut Zins unnd
was dieser brief weiset der
gemelten vigilia oder Spien zu Bregenz ytz unnd hinfüro Recht behafft unnderpfanddt haissen unnd
sein, für frey ledig unnd los
Dann zinst vor unnder die Linden Siben pfennig unnd ist mit sampt andern güetern umb drey Kreuzer
Jerlichs Zins verhafft,
Unnd also sollen unnd wellen ich mein erben unnd nachkomen ald wer söllich gemelt underpfanddt
künftig Imer Inhat,
dem genanten einzieher ald seinen nachkomen einziehern, die gemelten Zwelff Schilling pfennig
Jerlichs Zins hinfüro Jerlich
unnd Yedes Jars allain unnd besunder allwegen uff Sannt Martins des hailigen Bischoffs tag guetlich
Richten geben unnd geen
Bregenz zu Iren handen antwurten (für allermenigclichs entweren) unnd namlich one allen Iren Costen
unnd schaden, Dann
wo wir hieran sümig würden unnd den gemelten Zins in massen wie obstatt nit also Richtend unnd
gebend, So ist Inen von
stund an, das begriffen unnderpfanddt Zinsfellig unnd zu Rechtem aigen gefallen Also das Sy damit
Schaffen thun unnd
haussen mägen als mit Irm aigen guot von allermenigclich ungesumt in allweg, Unnd hierauff sollen
ich unnd mein er=
ben Recht guot getrew wären Haissen unnd sein für all abgeng Irrung Infäl nach dem Rechten in
unnsern costen one Iren schaden
Mir ist auch die fründschaft Beschehen Das ich unnd mein erben disen Zins mit bestimtem Hoptgut
drumb er erkaufft ist
wol wider abkouffen mugen mit erloffnem Zins vor Zinsfal wan nit Irrung in der münz ist, on geferd, Es
ist hier Inne fürnem=
lich bered Nach dem unnd vormals umb Zwelff schilling pfennig ain Zinsbrieff gewest, der verloren
sein sol wie obgemelt ist, Das
der selbig, ob er über kurz oder lanng widerumb funden unnd an tag kome, Crafftloß auch tod unnd ab
haissen unnd sein solle, Ich
obgenanter Jacob Bildstain als vogt Bekhenn Insonders hiemit das diser kouff unnd was diser brieff
ußweißst mit meinem gunst
hilff wissen unnd willen beschehen ist Unnd des zu warem Urkundt so hab ich obgemelte Elsbetha
Sazmennein als heptsechte und

Transkription: Hildegard Oprießnig-Luger

ich gemelter vogt In vogts weis, erpetten, den Ersamen und erben Adamen Klocker derzeit Amman zu
Torenbüren, das er
sein aigen Insigel für unns unnd unnser erben und nachkomen Doch Ime auch mir vogte seinen unnd
meinen erben usserhalb
der vogthey one schaden, an den brieff gehenckt hat, Der geben ist am Montag vor Sannt Martins tag
Nach Cristi gepurt fünff
Zehenhundert unnd Im Neununnddreyßigisten Jaure ~

Rückseite:

515

Nr. 218

~~Lit. B: L:~~

~~Nr. 60~~